



Knud Fleischer, Inatsisartuni ilaasortaq, Kattusseqatigiit Partiiat
/-Maani

**Nukissiuutit ataavartut atorlugit pilersorneqarneq pillugu § 37 naapertorlugu
apeqqummut 2012-036-imut akissuteqaat**

17. februar 2012
Sagsnr. 2012-061121
Dok. Nr. 830205

Asasara Knud Fleischer

Postboks 909
3900 Nuuk

Nukissiuutinit ataavartunit pisortat innaallagissamut aqquersuutaat atorlugit
innaallagissamik pilersorneqarneq pillugu apeqqutinnut qujanaq.

Tlf. (+299) 34 50 00
Fax (+299) 34 54 10
E-mail: iaan@nanoq.gl
www.nanoq.gl

Imaattumik apeqquteqarputit:

”Immikkut ittumik nukissiuutitigut pilersorneqarsinnaanermut periarfissat
pitsanngorsarneqarnissaat, taamaallilluni immikkut ittunik nukissiorfinnik misileraanerit
pilersitsinerillu imminut akilersinnaaleqqullugit, Naalakkersuisut pilersaarutigivaat.”

Akissut:

Pisortat innaallagissamut aqquersuutaat atorlugit innaallagissamik pilersuisinnaanerup
annertusitinneqarnissaanik Naalakkersuisut pilersaaruteqarput. Tamanna
Naalakkersuisut Nukissiorfiit suleqatigalugit qanoq iliorluni aammalu piumasaqaatit suut
atorlugit namminersortut nukissiuutinit ataavartunit (innaallagissiuutit VE-t) pisortat
innaallagissamut aqquersuutaannut pilersuisinnaanersut pillugit ilitsersuusiomerisigut
pissaaq.

Namminersortut innaallagissamik pisortat aqquersuutaannut pilersuinissaannik
Nukissiorfiit akuersissuteqartarnissaat sulinermi aallaavigineqarpoq. Taamaattorli pisut
ilaanni, soorlu innaallagissiorfik pilersuinerup patajaassusaanut imaluunniit pilersuinerup
isumannaassusaanut akornutaasinnaappat, attaviliinissamut qinnuteqaatinut
Nukissiorfiit itigartitsisinnaassapput. Pissutsit qanoq innerini Nukissiorfiit
itigartitsisinnaanersut ilitsersuummi ersarinnerusumik nassuiarneqassaaq.

Apeqqutininik suli misissugassaartoqarnera - nalunaarummik aalajangeraanissamut
taarsiullugu - ilitsersuusiornissamut tunngavigineqarpoq, assersuutigalugu nukissiuutit
ataavartut nukissamik pilersuinerup qanoq sunniuteqassanersut. Aamma
namminersortut innaallagissiuutininik VE-nik pisortat innaallagissamut aqquersuutaannut
attaviliinissamut piumanninnerat naammannersoq soorunami apeqqutaassaaq.
Ilitsersuutip piffissallu misileraaffiusup pissutsit taakku iluanni kingusinnerusukkut
maleruagassanik aalajangeraanissamut tunngaviliisinnaasunik
misilittagaqarnerulernissamut ilisimasaqalernissamulluunniit aqqutissiuussinissaat
siunertarineqarpoq.

§ 37 naapertorlugu apeqquteqarninni tunngavilersuutigaat, innaallagissiuutit VE-t Nukissiorfiit aqquersuutaannut attavilerniarneqartarnerat ajornartorsiorfiusimasoq. Tamatumunnga tunngatillugu erseqqissaatigiinnassavara, maleruagassat atuuttut naapertorlugit innaallagissiuutinik VE-nik, inoqutigiit innaallagissamik atuinerannut matussusiinnaasunik ikkussuussinissaq periarfissaqartinneqareemat. Taamaattumik innaallagissiuutit VE-t taamaallaat ajornartoornermi pilersuineranut atorneqarsinnaasut allakkavit ilumuunngilaq. Innaallagissiuutinilli VE-nik ikkussuussineq innaallagisserisumit akuerisamit isumagineqartussaavoq, aammalu sarfamut sakkortuumut maleruagassat malinneqartussaallutik. Tamatuma saniatigut ikkussuussineq Nukissiorfinnit akuerineqartussaavoq.

Apeqqutinni immikkoortup tullia innaallagissiuutit VE-t imminnut akilersinnaanerannut tunngasuuvoq. Tassanili tunngavissat pingaarutillit marluupput:

1. Innaallagissap akia

Innaallagissiuutinik VE-nik ikkussuussinermi inoqutigiit nukimmik atuinerisa matussuserneqarnissaa, aammalu tamatuma saniatigut pisortat nukimmik pilersuinerannut nukissiamik tunisisinnaanissaq pingaarnertut siunertarineqarpoq. Taamaattumik innaallagissiuutit VE-t minnerit namminersortunit pigineqartut imminnut akilersinnaanerannut innaallagissap akiata annertussusaa taamaalillunilu innaallagissamut akiligassami qanoq annertutigisumik sipaagaqarsinnaanissaq apeqqutaassapput. Kisiannili aamma immiut akilersinnaaneranut aki piginnittup innaallagissamik pisortat innaallagissamut aqquersuutaannut tunisinerminni pissarsiarisinnaasaa apeqqutaassaaq.

Nukimmik pilersuineq pillugu peqqussummi nr. 14-imi, 6. november 1997-imeersumi aalajangersarneqarpoq, akiliisitsinermi Nukissiorfiit aningaasartuutitut sipaagassaat aallaavigineqartussaasoq. Aningaasartuutit sipaarneqartut nalinginnaasumik Nukissiorfiit nammineerlutik tunisassiornissaminnut taarsiullugu innaallagissiuutinit VE-nit nukissiamik pisineranni uuliamut (tassalu nioqutissanik atuineranut) sipaarneqartunut tunngasuusarpoq. Sumiiffinni erngup nukinganik innaallagissiorfeqartuni, tassalu Nuummi, Sisimiuni, Tasiilami, Narsami aamma Qaqortumi Nukissiorfiit aningaasartuutitigut sipaagassaat killeqartorujussuussapput. Kisiannili periarfissaq alla atorneqarsinnaasooq tassaavoq, innaallagissamut uuttuutip "killormut" ingerlatilernissaa, tassanilu Nukissiorfiit aqquersuutaat innaallagissiuutitut VE-nut nukissamik toqqrterivittut atorneqartarput. Tamatumanili pisortat nukimmik pilersuiffiat (Nukissiorfiit) aningaasartuuteqassaaq, tamannalu maannakkorpiaq tamakkiisumik paasisaqarfigineqanngilaq. Tamatumunnga najoqqutassiassaq inaarutaasoq suli aalajangersarneqanngilaq, aammalu tamatamani Namminersorlutik Oqartussat maleruagassanik nutaanik aalajangersaanissaat pisariaqartussaavoq.

2. Allaffissornikkut aqutsineranut ikkussuinernullu aningaasartuutit

Taamatuttaaq inoqutigiinnut innaallagissiuutinik VE-nik ikkussuiniartunut atortulersuinissamut ikkussuuinissamullu aningaasartuutissat pingaaruteqartorujussuupput. Matumani atortunik ikkussuinermi aningaasartuutit sapinngisamik ikinnerpaanissaannut najoqqutassamik suliaqartoqarpoq. Ajornartorsiuut taanna aamma innaallagissiuutit VE-t atorlugit innaallagissiamut akiliisitsisarneq pillugu apeqqummut atasuuvoq, maleruagassat atuuttut naapertorlugit akiliisitsisarnermi innaallagissamut uuttuummik immikkut ittumik ikkussinissaq pisariaqartinneqarmat,

taamaattumillu atortunik piginnittumut saniatigut aningaasartuuteqarfiusussaalluni. Aningaasartuutit taakku – innaallagissiuutit VE-t angissusiat apeqqutaalluni - piffissami siviisoorsuarmi akilersorneqartariaqassapput.

Neriuppunga akissuteqarninni suliap killiffia, aammalu Naalakkersuisut sulinerminni sunik isumaliuteqarnersut periarfissaqarnersullu pillugit paasitissimassallutit.

Inussiarnersumik inuulluaqqusillunga

Jens B. Frederiksen